

Soraarnerussutisiallit pissakinnerit nammineq inigisaminniittut illuminnut 100.000 kr.-it angullugit aserfallatsaaliinissanut pisariaqartunut tigusaqarnissaannik periarfissinneqarnissaannut Naalakkersuisut upernaakkut 2016-imi ataatsimiinissamut inatsisissamik saqqummiinissaannik Inatsisartut aalajangiiffigisassaattut siunnersuut.

(Inatsisartunut ilaasortaq Ane Hansen, Inuit Ataqatigiit)

Akissuteqaat

(Ilaqutariinnermut, Naligiissitaanermut Isumaginninnermullu Naalakkersuisoq)

Siullermeerneqarnera

Soraarnerussutisiallit illuminnik aserfallatsaaliinissamut aningaasartuutininik akiliinissaminnik ajornartorsiutillit ikiorneqartarnissaannik periarfissiisoqarnissaanut siunnersuutaasumut Naalakkersuisut qujapput.

Siunnersuutigineqarpoq aaqqissuussinermi BS-inik illuutillit aaqqissuunneqarneri assigalugit aaqqissuussisoqassasoq. BS-inik illuutillit inigisap pitsanngorsarneqarnissaanut Namminersorlutik Oqartussanit taarsigassarsinikkut Namminersorlutik Oqartussaniit tapiissuteqartoqarsinnaavoq. Siunnersuutip matuma kingunerissavaa, soraarnerussutisiallit pissakinnerit nammineq inigisaminniittut illuminnik aserfallatsaaliinissamut 100.000 kr.-it angullugit tigusaqarnissaminnut periarfissinneqarnerat.

Siunnersuuteqarnermi siunertarineqarpoq innuttaasut amerliartuinnartut inuunermi ilarujussua sulinerikkut inuiaqatigiit ullumikkut inissisimanerannut ikiuutaasimasut pitsaanerusumik atugassaqartinneqalernissaasa qulakkeerneqarnissaa. Naalakkersuisut siunnersuuteqartuusoq isumaqatigivaat, innuttaaqatigut utoqqaat pitsaanerpaanik atugassaqartittariaqarivut. Naalakkersuisulli isumaqarput, soraarnerussutisiallit illuutaannik pisariaqartumik aserfallatsaaliinermik aamma naleqarnerulersitsiniarluni suliaqarnerup akornanni immikkoortitsisoqartariaqarnera aalajangiisuulluinnassasoq.

Ilumoortoq tassaavoq, eqqarsaatigeqqissaartariaqaratsigu, pisortat aningaasaataat qanoq atussanerlugit, tassa naleqarnerulersitsisumik pitsanngorsaanernut atorneqannginnissaat. Inatsisartut katersuunneranni matumani Naalakkersuisut soraarnerussutisialinnut inatsisissamut nutaamik siunnersuuteqarnikuupput. Inatsisissatut siunnersuutikkut qulakkeerneqassaaq aningaasakillioortoqartillugu imaluunniit pissutsinik immikkuullarissunik pisoqartillugu soraarnerussutisialinnut aningaasatigut tapeqartitsinissaq

Aningaasaqarnikkut ingerlatsinerup atasinnaassusia Naalakkersuisut aaqqissuusseqqinneranni ungasinnerusoq isigalugu pingaartitsineq aalajangiisuuvoq. Qulakkeerneqassaaq innuttaasunut kajumissaarutaasunik aaqqissuussisoqaannarani Nunatta Karsianut aningaasaqarnikkut patajaatsunik atugassaqartitsisoqarnissaa. Taamaattumik Naalakkersuisut sulissutigivaat, soraarnerussutisialinnut nalinginnaasumik aningaasatigut atugassarititaasut aamma sulisinnaassusillit sulinnarnissaannut kajumissaarinerit pitsanngorsarneqassasut, aammali aaqqissuusseqqinnerit aningaasatigut ingerlatsinikkut atasinnaassuseqassapput.

Aammattaaq Naalakkersuisunit malugeqquneqassaaq Nunatta Karsianut aningaasatigut kinguneqartussanik Inatsisartuni Naalakkersuisunilu aalajangiitilluta pisortat aningaasaqarnerannut kingunerisassat eqqarsaatigineqartassammata.

Naalakkersuisut kissaatigivaat soraarnerussutisialinnut nutaamik inatsisiliornikkut soraarnerussutisiallit aningaasatigut pissakinnerusut sullinneqarnissaannut isumaginninnermut inatsisit aqutigalugit ikiorneqarsinnaassasut.

Naggasiullugu Naalakkersuisut oqaatigissavaat, inissialiornermut tapiissuteqartarneq pillugu aalajangersakkat atuuttut malillugit nutarterinissamut, alliliinissamut imaluunniit BS-inik illuutigisat pitsanngorsarneqarnissaannut 100.000 kr.-nit angullugit tapiissuteqartoqarnissaanut periarfissaqartoq. Tamatuma saniatigut illuliortiternermut aningaasalersuineq pillugu aalajangersakkat atuuttut malillugit iluarsaassinnermut, pitsanngorsaannermut aamma illuutigisanik alliliinermut aningaasartuutit tamarmiusut 40-ii angullugit taarsigassarsisitsisoqarsinnaavoq.

Taamatut oqaaseqarlutik Naalakkersuisut inassutigaat siunnersuut akuersissutigineqassanngitsoq.

Naalakkersuisut Inatsisartut pitsaasumik oqallinnissaat qilanaaraat.